



Iesus est descendu de la Croix, & est osté par Ioseph & mis en vn linceul net.

R apres que ceux qui auoient crucifié Iesus-Christ, eurent veu le tremblement de terre, le voile du Temple rompu, les pierres fenduës, les sepulchres ouuerts, les morts ressuscitez, & le Soleil obscurcy : ils dirent, Vrayement cét homme estoit iuste, & estoit le fils de Dieu. Et toutes les troupes qui estoient là ensemble voyans ces choses, s'en retournoient frappans leurs poitrines. Or apres ces choses, le soir estant desja venu, pource que c'estoit le iour de la preparation, qui est deuant le Sabbath, voicy venir vn homme riche nommé Ioseph, de la Ville d'Armathie, noble Conseiller, homme de bien & iuste, lequel n'auoit point consenty à leur conseil, qui estoit aussi attendant le Royaume de Dieu, & auoit esté Disciple de Iesus, toutesfois secret pour la crainte des Iuifs : Il prit la hardiesse & s'adressa à Pilate, afin qu'il luy permist d'oster le corps de Iesus. Et Pilate s'ebahissoit s'il estoit desja mort : Mais l'ayant sceu du Centenier, il donna le corps de Iesus au susdit Ioseph, & luy permit l'oster de la Croix : ce qu'il fit, & l'ayant descendu de la Croix, l'enseuelit honorablement avec vn linceul qu'il auoit achepté.

S. Matthieu Chap. 27. S. Marc Chap. 15. S. Luc Chap. 23. S. Iean Chap. 19.